

SINAR HARIAN (4 MEI 2016 (KAMPUS) N/5 4

Ramai keluarga dibelenggu masalah kewangan

"PADA pandangan peribadi, perubahan dasar akan menjadi punca bebanan besar ibu bapa pada zaman intelektual untuk menanggung kos perbelanjaan terhadap pendidikan khususnya di peringkat menara gading," demikian pendapat penuntut tahun dua pengajian Ijazah Kejuruteraan Mekanikal (Automotif), Universiti Malaysia Pahang (UMP), Muhammad Redzuad Ras Abdul Rask.

Menurutnya, sebagai contoh pelajar Universiti Malaya (UM) dan Universiti Sains Malaysia (USM) membayar yuran sekitar RM2,000 setiap tahun bagi kursus ijazah kejuruteraan dan RM1,500 setahun untuk kursus ijazah perniagaan.

Katanya, berdasarkan statistik julat purata, pendapatan isi rumah bulanan ialah RM6,141 atau RM73,692 setahun pada 2014. Walaupun pendapatan isi rumah menunjukkan pembiayaan yuran institusi pengajian tinggi (IPT) mampu ditanggung namun kita perlu lihat dari konteks tanggungan lain seperti rumah, kereta dan barangan keperluan.

"Justeru, dengan perubahan dasar ini, ia mengakibatkan ribuan keluarga yang

tidak menerima BR1M dibelenggu beban kewangan yang tidak diduga," katanya.

Muhammad Redzuad yang juga Timbalan Yang Dipertua Majlis Perwakilan Pelajar UMP Sesi 15/16 mencadangkan agar dasar ini perlu dipertimbangkan dan dievaluasi semula dengan lebih terperinci.

Ini memandangkan pendapatan perkapita sesebuah keluarga perlu diambil kira dalam pemilihan penerimaan penuh pembiayaan maksimum PTPTN demi mengurangkan bebanan kewangan yang semakin meruncing dalam kalangan rakyat.

Selain itu tambahnya, tidak wajar untuk memilih penerima pembiayaan penuh PTPTN hanya berdasarkan pendapatan ibu bapa.

"Contohnya, jika sesebuah keluarga berpendapatan RM8,000 dan mereka mempunyai tanggungan yang menuntut di Institusi Pendidikan Tinggi Awam (IPTA) seramai empat orang, dan jumlah yuran mencecah RM2,000, sudah pasti semua wang pembiayaan itu dibelanjakan sepenuhnya.

"Jadi, keluarga tersebut tidak

mempunyai kewangan untuk menampung perbelanjaan lain. Oleh sebab itu, evaluasi pendapatan perkapita dalam sebuah keluarga perlu dipertimbangkan sewajarnya," katanya.

Menurutnya, PTPTN perlu dimanfaatkan oleh seluruh pelajar demi menyokong dan mendukung usaha kerajaan membantu pelajar dari segi kewangan.

Namun begitu, mahasiswa juga perlu berusaha mendapatkan biasiswa bagi membuka peluang kepada pelajar lain yang betul-betul memerlukan bantuan PTPTN.

"Selain itu, mahasiswa juga perlu mencari sumber kewangan lain seperti melibatkan diri dalam keusahawanan selari dengan hasrat Menteri Pengajian Tinggi Malaysia, Datuk Seri Idris Jusoh dalam lonjakan pertama Kementerian Pengajian Tinggi, iaitu melahirkan graduan holistik berciri keusahawanan seimbang," akhirnya.



MUHAMMAD REDZUAD